


9. YENSA (3)



Certaines parties des Évangiles, (Injil),
Matthieu, Marc, Luc et Jean en langue
Baynunk, guñaamolo.

Illustrations : Graham Kennedy

© Foundation Matters

© Vision Intégrale, Ziguinchor, Décembre
2018

Adresse e-mail :
visionintegrale.bk@gmail.com

Gudoyahu m'andékehne guliirehu kólibáro inko

A kólibáro inko koliiho inninghunonj misaalhu Yensa.

Agida a Gúloku Díno ayikyik líibárenj alabayen
n'antohne na. Ulahunkuneh misaalhu Yensa a gúbido
g'ayéjuhne Injilo. Anñaañaañ na ho Yensa akanne ingi ho
Yensa akawandinne. Anfak anñaañne na ho jamaño
ankaanemne.

A Gúloku Díno ayikyik índiigen irenik m'aretuh Matiya
ingi Mak ingi Luk ingi Sañ m'anñaañ mojon mojon Injilo.
(Agida ayikyik Injilenj arenekenj.) Immerenj nip
ammajamaja buñaaño misaalhu Yensa a waato no
yikiregne ordinatááro wola yikirenj masineño no
buwempiriime. Horanj akanne k'ammaja bukaano nim?
Ankankaan nim mara misaalhu Yensa taalintaal girenj.
Honj h'ayik. Índiigeno immerenj ansíibásiib ki jamaño nip
anyennehin gu Yensa. Ansíibásiib ki fi mess uyennehin.
Úpájulenj, aji uliire Injilo ulahunkuneh na Kúmbuuñaamo
Kúnsuuminno k'afúruntné imbi Díno Amánduko. Karañar
k'ukaan na jamméej! Ulahunkuneh Kúmbuuñaamo
Kúnsuuminno k'apirenkineh adooto básuum báde a
hafithen.

Gureto ingi Guwarabo	Gureto ingi Gufáransenjo
Yensa	Jésus
Mariyama	Marie
arijanna	le ciel
jahánama	l'enfer
maleekano	l'ange

Mak Sapitáro 11

¹ Angu Yensa ingi ñantaalibehinem ingi barumuno andék f'andék andas Jerusalem. Anwonn a Montaña no Olifo k'antéeja akoorongo n'aretuhne Betafaj ingi Betani. Bampút na Yensa afúnn ñantaalibehinem inak

² ayéjeenin :

- Ninkinan inini ii, dékerek ba a bukooro bojon b'injonnahone. Úputonjdir ulahunkunaj na kofali kotiir k'anébaane ko wúur ñafahadan. Gulahunemey na ukeekiremey k'udooromoy. ³ Kanda m'amíihonun ayéjoonun : « Ninkinan, beeraj gúdekukejne kofaliño ? » Úyejemey : « Umuyhintor ahaajahemne. Abolladir anjoyindito. » Nim guñantahenejte teekinemey. Ulobonjdir nim alókihineh.


⁴ Angu fo Yensa alóbne nim, andék ampút a kosaariño k'anlahun na kofaliño kotinno a bakaranku binaalo n'ahobaane a burukumbanku dígo. Banfégem andék ba bukeekihinem. ⁵ Ayikyik m'anfégeenejne anyéjeenin :

- Huy ! Ninkinan, horaj akanne k'uhoobulonj kofaliño ?

⁶ Banlóbi nim ñantaalibeno anjoyindeenin ni Yensa ayéjeenejne. Ñantaalibeno banlóbi nim mees ambéneenin k'andékur kofaliño. ⁷ Bampút imbi Yensa andooh kaalankánin anlefirem a kofaliño. Banlefi mees Yensa anaf k'antuñul hadéko ba Jerusalem. ⁸ Ñanlabahi banfégi

Yensa n'adékirehne andooh kaalankánin anlefur Yensa a binaalo k'ambendihem. Índukonjo andooh jakeelayo j'anlekerne a kanaanjo k'anlefirem na bubendihinem.

⁹ Jamaño m'ankokayne ingi úmár tu ankomb bupeejo k'anyéjeh :




- Fuuhurintenḡ DÍino ! Ummu mu Umuyhintor abúuñurne, Dín akaan ayik barake. ¹⁰ Maasayahu maamankintor Dawuda n'adék adékekinehne, Dín akaan ayik barake. Fuuhurintenḡ DÍino, DÍino n'afañumne n'ayik sembe !

Nim jamaño ampeejne dam f'anḡane bubendiḡu Yensa.

Mak Sapitáro 14

¹⁰ Angu ayikyik utaalibe úduk m'atoh a ñantaalibenjo haalano ingi inako m'ankokayehne ingi Yensa. Gurethinem Judas Iskariyot. F'afégne ho udikaamo akanne adék imbi ñanlaameku alimaamaño b'angune. Apúti ayéjeeniñ apirenkineh ajuliyareeniñ bigoku Yensa. ¹¹ Immeren bayennehini hómár asúumeeniñ fanfan k'andiigem bakodiño. F'andiigemne bakodiño Judas aṇoolin aṇay bútibó n'akankunehne k'ampiren anlah Yensa.



¹⁸ Banṇay guyaahálanjo Yensa ayéjeeniñ :

- Ingah ! Janteneñ bañ k'íteekinoonunṇ marigeno :
Mintor mañ n'inoohoonunṇne guyaahálanjo tu, ayikhineh
úmánduk m'adékehne gujuliyahu bigokum.

¹⁹ Balóbi nim abemeeniñ dáde k'ammikem úmánduk


úmánduk ayéjhem :

- Kodi me gireŋ eh ?

²⁰ Ayéjeeniŋ :

- Ingah ! Ninkinan haalaŋo ingi inako m'unoohenne nanka, úmár umomiye ingi mintor n'anay bupocilahinku úmbuuro k'anumun a basooreso ingi me. ²¹ Fegen baŋ, maŋ ni añaañaane a Hañaañaeno maŋ nim Údiigeeno M'acaabenaane gadékehne biniironjo, kanda wúuro m'ajuliyahánehe bigokum, úmár ayokánehe fanfaŋ. Haman bosiirahe akohi.

⁴³ Angu fo Yensa aŋane balóbo Judas apútor, Judas m'atohne ingi ñantaalibeŋo haalaŋo ingi inako. Jamaŋo jup aŋjáábintemne n'anlah basandiŋo ingi jigolongo. Agida ñanlaameku alimaamaŋo ingi ñankeekihu Hañaañaeno ingi ñanlaamero ambúuñureeniŋe. ⁴⁴ Agida, wúuro m'ajuliyane bigoku Yensa, n'anyennehinay fam ingi immerenŋ n'anyitorunkunehne Yensa. Ayéjeeniŋyej :
« Inini gímputoŋ n'ukankánaŋe k'uyitemeŋ agune me, iramaymiŋdir, ífoonaymiŋdir, úpájuláŋ maro maŋ úmár, k'ukolomoŋ k'ulahamaŋ hóbun k'údekiremeŋ. » Nim Judas atéekineeniŋe fam.



⁴⁵ Angu jaketo nómár Judas f'apúturne ka Yensa ingi ñantaalibehinem angune awaliṅ Yensa k'aramam afóonom ayéj :

- Arafan !

⁴⁶ Fo Judas akanne nim m'anṅáábintemne andék anlah Yensa. ⁴⁷ Banlahem ayik úduk m'adék afúnn busandihinem k'adék imbi úsoku alimaamo adénno alek bulaahánam.

⁴⁸ Angu Yensa bafégi jamaṅo m'andékirne bulakánam ayéjeeniṅ :

- Ii ninkinan, hóge me urifa ? Horan akanne udooron ingi basandiṅo ingi jigoloṅo ba bulakum ? ⁴⁹ Agida gucum gucum úfegeemuṅ a Jaameṅo Adénno n'ídekeh gukawandino ? Kanda lahurumuṅ na. Inini upirenen ulahaamuṅ maro inho añaañaañaañyer. Anñaañaañ a Hañaañeno maro hómár ayikhineh maro údekikineṅ úduk

ulahaamuŋ.

⁵⁰ Angu banlahi Yensa, ñantaalibehinem nip ambén na Yensa k'angír.


⁵⁵ Afúrumi na, ñanlaameku alimaamaŋo ingi m'antohne a Tilibinaalo Adénno nip m'anrahne na ansíiba gúneku Yensa kayúulen ki nim ampiren ambujom. K'angu ammiiheh jamaŋo m'anyéjhinehne Yensa akankaan hójondoŋo. Kanda yikireŋ m'anlóbhuneh nim. ⁵⁶ Agida ayikyik ñanlabahi m'ankeng k'ansíiba bujodanku Yensa, kanda halókánin raháraŋaŋ. ⁵⁷ Ayikyik m'ankeng bujodanku Yensa, anyéj :

⁵⁸ - Mint ii iyennehinminyennehin n'ayéjne ba bukoomunku Jaamehintor Adénno n'anlódne k'anooh ásiibaŋ alallaŋ k'alód adúk no jamaŋo danlód.

⁵⁹ Kanda banlóbi nim índukoŋo yennehinayreŋeŋ.

⁶⁰ Banlóbi alimaamo adénno akeng a sígihu jamaŋo nip k'ayéj Yensa :

- Inini, immi tu kayúulen k'anfégne a binankan, inini fi dujaabi ? !



⁶¹ Yensa akota sii. Jaabiirem haani gúlob úngonduk.
Angu alimaamo adénno amiihem ayéj :

- Hóge fi ingine Umaasaño Mu Díino Acaabenne, Úbáku
Díino N'aramunkuhne ?

⁶² Yensa aṇoyindem ayéjem :

- Me ingine maṇ úmár. Inini, ninkinan nip ayikhineh
bísiba b'úpájul b'úfekineṇ Údiigeeno M'acaabenaane
n'annooḥ ingi Díino. Oo ! Anokuneh a jiyaku Díino
N'afaṇumne N'ayik Sembeṇo, a kantígo k'abúuñahuhne.
Úfegekinemeṇ n'adékireh a hakubo k'aṇooliner ba a
duniyaṇo.

⁶³⁻⁶⁴ Yensa bayéji nim alimaamo adénno anuyom dáde

k'alah gusolhunom g'akaanane abic,¹ k'ayéj :

- Inini ninkinan, yennehinej ban ! Asutunsutun Díino !
Síibaaronj ki úduk aséediya. Eke ninkinan tu
uyennehinejyennehin h'ayéjne ? Angu ninkinan, ii, neeranj
gúyejejne ?

Angu ñamhu tilibinaalo nip ankomb búyejo :

- Abábár abujaa.


⁶⁵ Banleki balóbo mees índukonjo ankomb
bulotunkunom. Índukonjo annébem k'ammibem.
Bammibem ammaham, anyeefihem, ammikem :

- Inini, hantanj amalenne ?

Afúrumi na, ñammarahu Jaamejo Adénno andoohom ki
immerenj mees ammaham.

¹ 14.63-64 Ñanyahudo agi jifahánin annuy wola anyik baléer nim
gankaanahne k'ambic bayakánin.

Mak Sapitáro 15



¹⁶ Fo Pilat abéndureeninje Yensa, soldaarango andoohom ba a jégenenku díku gúfánááro k'anhuyor guruphu soldaarango nip. ¹⁷ Bampút angáágám tabéno takeeno, agida fam n'anfúnn gusolhunom mees. Andooh jalihamo j'ayikne jálindo k'angoolumbin k'anhooburindem a bigof. ¹⁸ Bambollay angu anyeefihem, anyéjehem :


-Ii ! Umaasahu Ñanyahudo, Díin akaan usimaya !

¹⁹ Andooh ñanhonjo k'ammaham a bigof, anlotunkom, anrunjah a jannokunom. ²⁰ Banyeefulem mees anwatam tabéno takeeno t'angáágemne k'ankandáram bayakánam k'anfúnnom a bílido k'antunul hadéko b'andékehne bufanunahinkinem a halihano.

²¹ Banjay hadéko anlahun údiigeen úduk m'afúruntoho a

kananjaño. Gurethinem Simon mu Siiren. Úmár bááhu Aleksand ingi Rufus. Soldaaraño banfégi Simon anlaham andoohálinem halihano ha Yensa añantane adooher k'annohálinay anjay hadéko. ²² Andék f'andék ampút a kantígo k'aretuhne Golgota. Gureto gúmár agune « ka jahunku agofonjo agune. » ²³ Bampút kantígo andooh kunnogo k'angatahinne ingi sihano s'aretuhne mááro pur k'annéereem k'aruuh, kanda afoy, ruuhuron. ²⁴ K'angu andooh halihano k'andoohom anfañánahinem na. Banfañunahinem mees anwóoj gusuno anwonnun na halihano. Bankaani nim mees annink bayakánam b'anwurajemne k'andooh ñolihano k'anjay tiraaso m'adokunehne bayakánam, ki m'afañundne harjehinem adooh. ²⁵ Bi waathu guraaso gudikaamo ganfañánahinemne a halihano.

²⁶ Banfañánahinem mees ankaan maj ni ankaanahne. Andoodooh honj k'anñaañ h'akanne anfañánahinem. Anñaañ na anyéj, « Ummu Umaasahu Ñanyahudo. » Banñaañi nim mees anfañánahin honjo hómár na a halihano. ²⁷ Dam, d'anfañánahinne Yensa, anpak anfañánahin na ñanrifa inak, úduko a sigondiño, úduko a siyaaho.



²⁹ Angu dam ñanwusunango anlíklikeh agofonkánin k'ansutunkom, anyéjehem :

- Hey ! Eke úyejyej ukoomunkuneh Jaamehintor Adénno, k'úlod adúk buruhu ásibanj alallanj ? ³⁰ Inini, pahun banj bigokon k'ukucor a halihano !

Nim ganyeefighemne. ³¹ Angu dam ñanlaameku alimaamaño ingi ñankeekihu Hañaañeno, immerenj mees anyeefighem k'anyéjajeh :

- Ingah ! Úmár ii ahathat gupahunku jamaño kanda határanj bupahunku bigokunom ! ³² Inini m'ayéjuhne Umaasango Mu Díino Acaabenne, umaasahu Israyel, inini akuc banj a halihano ki nim impirenoñ índomonj h'alóbohne !

Nim jamaño ganlóbohne dam. Ñanrifango inako m'anfanánahinne na antéejay ingi Yensa, immerenj mees

ansutunkom.

³³ Afúrumi na, waathu báárigo bumurul búde akucor a didiirango nip amurul bim baman rayiibo. ³⁴ Angu waathu rayiibo Yensa apeej, ayéj :

- Eluwi ! Eluwi ! Lamah sabak tani ? !

(Gúmár ingine ingi gúlokánin « Dínkum ! Dínkum ! Horan akanne k'uhobálaham ? ! »)


³⁷ Kanda Yensa awuuga dáde k'akira aniiro.

³⁸ F'aniirone, bejen a saarigo, a Jaamengo Adénno, ridongo n'agune a cibirhu jaamengo afaçoora. Káriman a raafó baman a réengo, akaan habíd hanak. ³⁹ Ulaameku soldaarango m'awonnáne a halihano k'anay buninghu Yensa, f'afégne n'aniirorumne ayéj :

- Hah ! Marigen ! Ummu kaama Úbáku Díino.

⁴²⁻⁴³ Afúrumi na, bísibango bañuuni ayikyik údiigeen m'apútor m'ayéjuh Yisuf, Yisuf m'afúruntne bukooro b'aretuhne Arimate. Údiigeenno úmár ambúuñahembuuña nip a gubaarhu dohongo n'adohohne a Tilibinaalo Adénno. Agida Yisuf gúputhu maasayahu Díino gatúyohne. Angu n'agune bísibahu kaparengo, (gúmár ingine gucunkunom

ingine bísibahu guyohálanjo,) Yisuf ingi babollen gadékne imbi Pilat úgufánááro. Bapút akiinaham búgáku Yensa.




⁴⁵ Fo ulaameku soldaaranjo ayéjemne « Yensa aniironiirro mees, » fam Pilat alókinge ki Yisuf adooh búgááro. ⁴⁶ K'angu adék gugilahu kasankenjo k'adak alahun búgáku Yensa b'anfanáhinemne. Bapúti akucun búgááro k'agúubin. Bagúubinem mees adék asuuturaham a gusun g'úpájulne g'anfilne a bawaalo akankaan ininkaman ránkáb. Babollay adooh dawaal arok buruhu búyindo k'adék adoona. ⁴⁷ Angu f'akanne nim Mariyama m'afúruntné Magdala ingi Mariyama nunku Joses anfégemfeg a gusuno gúmár.

Mak Sapitáro 16

¹ Afúrumi na, bísibango bi guyohálanjo bafúri, Mariyama m'afúruntné Magdala ingi Mariyama nunku Jak ingi udikaamo m'aretuhne Salome andék angila kárámánjo k'anyéj ba buhupuno a búgááro. ²⁻³ Dimanso, anfúra tápáro k'antuñul hadéko ba a búyindo. Banñay hadéko, anjaahinay anyéjeh :

- Inini mintoron, hantañ gadékehne búfunndukintor dawaalo d'arokaane a buruhu búyindo ?



⁴ Nim gammiihayne maro dámár afufuuh dáde. Angu anyoofun agírenkinin anñanden maro dawaalo arokulaarokul. Bampúti harennaamo ⁵ anñan a búyindo. Banñani anlahun hambaani n'anoone na a jiyakánin, úmár ingi bayaah bafer. Banfégem anjuhula. ⁶ Kanda

hambaaniŋo ayéjeeniŋ :


- Ninkinan, dahu údeyuneiŋ ! Me ípápájul maro Yensa mu Nasaret gútibheŋe, m'anfaŋunahinne a halihano. Dókuloŋ k'úfegeŋ k'anninkemne. Ningeŋ baŋ ! Guyroŋ nanka maro Díino akengunemkengun a biniiroŋo k'adék adoona. Ningeŋ baŋ k'anninkerne búgááro ! ⁷ Inini, ninkinan dékereŋ imbi ñantaalibehu Yensa ingi utaalibehinem Piyeer mees. Inini gúputeŋ úyejeeniŋ :

- Ambúuñribuuñ mint anyéj úteekinahanŋ maro Umuyhintor akengunkengun Yensa a biniiroŋo. Guyroŋ angu a búyindo. Adékhineh atúyoonuŋ bim a resiyonŋo n'aretuhne Galile. Kuku údekeŋ úduk ulahunamaŋ bim maŋ ni ayéjoonuŋne fam.

Nim hambaaniŋo m'anoone a búyindo atéekinne indikaamo.

⁸ Angu indikaamo banyennehini hómár anfúror a búyindo k'angír. Ambenuhbenuh fanfaŋ fo anñaŋunah. Andéyundeyun fo bollendeŋeŋ búteekinku wúur h'anfégne a búyindo ingi h'ambúuñameeniŋne.

Luk Sapitáro 24



³⁶ Fo ñantaalibenjo immerenḡ anḡane butifuku ñantaalibenjo haalaḡo ingi úmánduko h'awusunane, Yensa fankánam ahar afúror awonn a jégenenkinin k'ayéjeeniḡ :

- Básuumo aguy a binanan !

³⁷ Banfégem anlah kara jífur ganfégne k'ambenuh dáde, anjuhula. ³⁸ Yensa bafégi n'ambenuhne ayéjeeniḡ :

- Ninkinan, horaḡ gujuhulaheḡne ? Horaḡ akanne k'umantekeḡ maro me íjebjeb ? ³⁹ Ningenḡ baḡ halakum ingi hádikum. Maḡ me me ! Mapunaamuḡ baḡ k'úfegen ! Eke jífuro gara ayikeh ahar, gara ayikeh guhun ? Kanda agi umapuneemuḡ upájihinenḡ mara arinkum ayikyik ahar, ayik guhun.

⁴⁰ Yensa balóbi nim mees ajellihineeniḡ halakánam ingi

hádikinem. ⁴¹ Haman nim pirendeney k'andóm hómár a gubaarhu n'abineeniñne dáde, anfak amantereh. K'angu Yensa amiiheenij :

- Iyéji, yikuroñ nanka jafoola ?

⁴² Balóbi nim mees annétem kolekilenku kokat koginaa.

⁴³ F'annétemne adooh akáb a sígihinin. ⁴⁴ Bakábi mees ayéjeeninij :

- Eke íyejoonunyej f'enrojoonunye sinkokayo mara h'añaañaane a nintiku me a hañaañenku Musa ingi inha anabiyonjo ingi a Jabuura adak akankáneh ? Mañ hómár ayikne ásibaño innon

⁴⁵ Balóbi nim mees akeekireeninij ki moñon moñon apiren apájul h'anñaañne a Gúloku Díino a nintiku úmár Yensa.

⁴⁶ Afak ayéjeeninij :

- Anñañaañ a Gúloku Díino maro jamaño anyohenkineh Umaasaño Mu Díino Acaabenne k'aniiro ki dahankánam ajébhineh k'akeng. ⁴⁷ Anfak anñaañ na maro jamaño andékhineh ankawandin duniyaño nip, imbi siyeño tu a gurethinem. Ankumansháneh a bukooro umbu, Jerusalem, k'ampas andék a duniyaño bejen bejen. Gampúti antéekinkineh jamaño mara anñantay ankúbul jamméejenkinin imbi Díino ki nim Díino akafari jínubonkánin. ⁴⁸ Inini, ninkinan uguyeñne séedenku h'ayikeemne. ⁴⁹ Me faño íputdir arijanna íbuuñutokunoonuñ sembeño n'afúruntné arijanna no

Bááhum ajíkirindoonuṅne. Kanda uñantahenṅ útuyonṅ a bukooro umbu fo baman gikucundutoonunṅ nómár a binanan.

Nim Yensa alóbne ñantaalibehinem.⁵⁰ Banfúrumi na Yensa afúnneenṅ a bukooro andék antéeja bukooro b'aretuhne Betani. Bampút Yensa ayoofun halakánam k'aduwareenṅ.

San Sapitáro 14

¹ Yensa ayéjyej ñantaalibehinem :

- Inini ninkinan, waanintṅ ilaahánan. Fiyintṅ Díino k'uṅoolineṅ ufiyumeemunṅ. ² Inini, díku Bááhum afufuuh dáde. Ídekhineh ídek íjoonindoonunṅ kannokánan. Aji hómár yikireṅer díloboonunṅ. ³ Inini, túyoreṅ k'ídek íjooninditoonunṅ kannokánan k'iṅooliner ídek idoohoonunṅ ba bim k'inguyonṅ kantíg ínkánduk. ⁴ Inini, ninkinan, úpájulenṅpájul binaalo b'uñantahenṅne údekumenṅ bam bim.

⁵ Balóbi nim utaalibeṅo m'aretuhne Toma ayéj :

- Umuyhint, mint pájiirimṅ b'údekehne hadéko. Inini neeraṅ gídekeminne ba bukaano k'ípájulmṅ binaalo b'ídekunkuneminne bam bim ?

⁶ Balóbi nim Yensa aṅoyindem ayéjem :

- Maṅ me me igune binaalo, me igune marigeno, me igune kanjébo. Wúur dapiren k'adékoora imbi Bááhum fo

adékum a binaam.

Horan ginningonne a misaahu Yensa ?

A kóliibáro inko ínfegonfeg mara Yensa aniironiiro a halihano. Kanda banwúbem, bísibano bilalliino, akeng a biniirono.

Kanda horan akanne ki Yensa aniiro ? N’agune Úbáku Díino apirenpiren akaan ki jamaño daha ambujom. Angu, horan akanne ki Yensa abénn jamaño k’ambujom ?

Úpájuli, fo Yensa aniirone, acaamcaam jínubonkintor. Aji újegumi luwahu Díino, uñantay ucaam. Kanda ducaam ingi bakodiño. Ucaamháneh ingi biniirono. Díino, neeran gayéjne Adama ingi Awa ? Ayéjeeninnye mara aji andómi bídimerenku sinono s’adígumne, annirohune. Ayéj Adama : « Da údomhunehne bídimerenkinem unirohune. » Angu m’anjégumne luwahu Díino anñantay ancaam. Bacaamo bámár ingine biniirono. Faka, lentaaren mara biniirono ingine símbennayo ingi Díino. Símbennayo ingi Díino manini, ingi símbennayo ingi Díino bandór a kantígo k’aretuhne jahánama. Mintoron nip, ínjegumoonunjegum luwananku Díino. Mintoron nip inñantahoonun incaamoonun. Mintoron nip inñantahoonun inniروهونoonun k’índokoonun jahánama.

Kanda Yensa adékridek a duniyano k’apahun mintor. Adékridek a duniyano ki k’anéer mintor kanjébo ka

bandór. Angu, Yensa, neeraŋ gakanne ki k'apahun mintor ? Neeraŋ gakanne k'apiren anéer mintor kanjébo ka bandór ? Úfegen, Yensa acaamcaam buruhu mintor ! Acaam ho mintor inñantahoonuŋne incaamoonuŋ. Aniiironiuro buruhu mintor. Adoohunadoohuna jínubonkintor k'anyohenaa buruhu mintor.

Angu Yensa aniiironiuro k'acaam jínubonkintor. Kanda Gúloku Díino ayéji mara aji úsiibay ki Díino akafari jínubonkon, uñantay ufiyum Yensa. Uñantay ufiyum mara Yensa ingine Úbáku Díino m'adékirne a duniyaŋo aguy uraagof. Uñantay ufiyum mara fo Yensa aniirone a halihano. Acaamcaam jínubonkon nip. Angu aji ufiyumi Yensa, Yensa bareŋ baman a hafithen, Díino ayéji mara akafarihineh jínubonkon nip. Afak anékuno kanjébo ka bandór, ki haani uniuro, újebhineh bandór arijanna.

Lentaaren ho Yensa ayéjne a Injilhu Saŋ sapitáro 3 :

¹⁶ Féger baŋ, Díino apokunpokun duniyaŋo fo adék anéereeniŋ Úbárám, Úbárám úmánduko m'ayikne. Nim gakanne ki ugurumaaren a fiyumne Úbáku Díino, wúuro úmár dakoomahar. Buruhu k'akoom, m'afiyum Úbáku Díino ayikunkuneh na kanjébo ka bandór.